

Ukidanje de facto postojanja općine Skelani

Danas je Visoki predstavnik Wolfgang Petritsch izdao pravno mišljenje kojim se de facto općina Skelani proglašava neustavnom, i shodno tome je ukida.

Takozvanu općinu Skelani je 1992. godine osnovala Narodna skupština Republike Srpske, ali ta općina nije nikad doživjela priznanje međunarodne zajednice. Kod formiranja općine među većinskim bošnjačkim stanovništvom Srebrenice i Skelana nije proveden referendum, niti drugi vid izjašnjavanja. Visoki predstavnik smatra da je Narodna skupština RS-a iz političkih razloga željela da izolira grad Srebrenicu, te da ga odvoji u sigurnosnom, teritorijalnom i ekonomskom smislu.

U proteklom periodu su nepriznati nadležni organi u naseljenom mjestu Skelani, u južnom dijelu općine Srebrenica, vršili negativan utjecaj na rad novoosnovane zajedničke općinske administracije u Srebrenici. Postojanje de facto općine Skelani je sprečavala ekonomsku obnovu i otvaranje novih radnih mjesta. Ured Visokog predstavnika je iz tih razloga provjerio pravnu valjanost postojanja općine Skelani i ustanovio da općina Skelani nema takvu valjanost.

Ustavom Bosne i Hercegovine se svim izbjeglicama i raseljenim osobama garantira *"pravo na slobodan povratak u svoje domove."* U Ustavu takođe stoji da će na snazi ostati samo oni zakoni, propisi i sudski poslovnici koji su u skladu sa Ustavom. Osim toga, Aneks 7 Daytonskog mirovnog sporazuma poziva, između ostalog, na stvaranje *"političkih, ekonomskih i socijalnih uslova koji će omogućiti dobrovoljni povratak i harmoničnu reintegraciju izbjeglica i raseljenih osoba"*.

De facto postojanje općine Skelani je bilo u suprotnosti sa Ustavom Bosne i Hercegovine, kao i sa Aneksom 7 Daytonskog

mirovnog sporazuma. Njeno postojanje je osporavalo rad zajedničkih organa općine Srebrenica i odvojilo grad Srebrenicu od značajnih ekonomskih resursa.

Iz naprijed navedeni razloga *Zakon Republike Srpske o formiranju srpske opštine Skelani* je neustavan i danas ga je Visoki predstavnik proglasio ništavnim. U Skelanima više ne postoje zasebni organi. Naseljeno mjesto Skelani se nalazi u sastavu općine Srebrenica.